

五代史記注

五代史記卷第七十四

廬陵歐陽脩撰

徐無黨原注

南昌彭元瑞注

劉鳳誥排次

四夷附錄第三

奚本匈奴之別種當唐之末居陰涼川在營府之西幽州之西南皆數百里有人馬二萬騎分爲五部一曰阿耆部二曰曷米部三曰曷質部四曰奴皆部五曰黑訖支部後徙居琵琶川在幽州東北數百里地多黑羊馬趨前蹄堅善走其登山逐獸下上如飛契丹阿保機強盛室韋奚霫皆服屬之奚人常爲契丹守界上而苦其

苛虐奚王去諸怨叛以別部西徙媯州依北山射獵常
採北山麝香仁參賂劉守光以自託其族至數千帳始
分爲東西奚去諸之族頗知耕種歲借邊民荒地種稌
秋熟則來獲窖之山下人莫知其處饗以平底瓦鼎煮
稌爲粥以寒水解之而飲去諸卒子掃刺立莊宗破劉
守光賜掃刺姓李更其名紹威紹威卒子拽刺立同光
以後紹威父子數遣使朝貢初紹威娶契丹女舍利逐
不魯之姊爲妻後逐不魯叛亡入西奚紹威納之晉高
祖入立割幽州雁門以北入于契丹是時紹威與逐不
魯皆已死耶律德光已立晉北歸拽刺迎謁馬前德光

曰非爾罪也負我者掃刺與逐不魯爾乃發其墓粉其骨而颺之後德光滅晉搜刺常以兵從其後不復見于中國自去諸徙媯州自別爲西奚而東奚在琵琶川者亦爲契丹所并不復能自見云

五代會要奚本匈奴別種卽東胡之地人物風

俗與突厥同族有五姓一曰阿蒼部管縣六二曰啜米部管縣四三曰粵質部管縣六四曰奴皆部管縣四五曰黑訖支部管縣三每部有刺史每縣有令酋長號奚王唐制兼饒樂府都督居陰涼州東去營府五百里南去幽州九百里幽州置饒樂府長史一人以監之人馬約二萬後徙居琵琶川在幽州東北數百里出古北口地宜羊馬羊則純黑馬則前蹄堅善走以馳獵爲務逐獸高山自下而上其勢若飛語與契丹小異纓以平底瓦鼎煮糲爲粥既飪以寒水解之而食每春借邊民之荒田種糜秋熟乃來持獲畢則害于山下人莫知其處所以木爲碓斲樣爲臼所受不過一斗自天祐初契丹兵力漸盛室韋奚霫皆受制焉故奚之部族爲契丹代

守邊土暨契丹虐其首領去諸怨之以別部內附徙于
媯州依北山而居漸至數千帳故有東西奚之號去諸
卒其子掃刺代立後唐莊宗破幽州賜掃刺姓李名紹
威後唐同光元年十二月遣使朝貢三年九月以莊宗
誕節至遣使表貢方物天成四年掃刺因剪爪傷乃卒
其子素姑代立亦時遣使入朝清泰三年七月其首領
達刺千遣通介老奏其王素姑謀叛欲附契丹已處置
訖權知部落廢帝降詔以撫慰之晉天福元年高祖以
契丹有助立之功割雁門以北及幽州之地以賂之由
是奚之部族復隸于契丹自後常爲契丹之所役屬開
運三年十二月契丹犯關其王拽刺以所部兵屯于洛
陽及契丹歸隨嶽北道通鑑注五姓奚一阿薈部二
處和部三粵失部四度稽部五元
俟折部各有辱紇主爲之酋領

吐渾本號吐谷渾或曰乞伏乾歸之苗裔自後魏以來
名見中國居于青海之上當唐至德中爲吐蕃所攻部
族分散其內附者唐處之河西其大姓慕容拓拔赫連

等族懿宗時首領赫連鐸爲陰山府都督與討麗勛以
功拜大同軍節度使爲晉王所破其部族益微散處蔚
州界中莊宗時有首領白承福者依中山北石門爲柵
莊宗爲置寧朔奉化兩府以承福爲都督賜其姓名爲
李紹魯終唐時常遣使朝貢中國晉高祖立割雁門以
北入于契丹于是吐渾爲契丹役屬而苦其苛暴是時
安重榮鎮成德有異志陰遣人招吐渾入塞承福等乃
自五臺山入處中國契丹耶律德光大怒遣使者責謂
高祖高祖恐懼遣供奉官張澄率兵搜索并鎮忻代等
州山谷中吐渾驅出之然晉亦苦契丹思得吐渾爲緩

急之用陰遣劉知遠鎮太原慰撫之終高祖時承福數遣使者朝貢後出帝與契丹絕盟召承福入朝拜大同軍節度使待之甚厚契丹與晉相距于河承福以其兵從出帝禦虜是歲大熱吐渾多病死乃遣承福歸太原居之嵐石之間劉知遠稍侵辱之承福謀復亡出塞知遠以兵圍其族殺承福及其大姓赫連海龍白可久白鐵匱等其羊馬貲財鉅萬計皆籍沒之其餘衆以其別部王義宗主之吐渾遂微不復見初唐以承福之族爲熟吐渾長興中又有生吐渾杜每兒來朝貢每兒不知其國地部族至漢乾祐二年又有吐渾何戛刺來朝不

知爲生熟渾蓋皆微不足考錄

唐會要乾寧元年六月

五代會要吐渾本吐谷渾也唐咸通中酋長有赫連鐸者從太原節度使康承訓平徐方有功朝廷授鎮武節度使復盜據雲中後唐太祖逐之乃歸幽州李匡儔其部族散居蔚州界立爲酋長其居不常有白承福者自同光初代爲都督依中山地石門爲柵莊宗賜其額爲寧朔奉化兩府以都督爲節度使仍賜承福姓李名紹魯其畜牧就善水草丁壯常數千人羊馬生息入市中土朝廷常存恤之後唐天成三年二月其都督李紹魯等遣使進馬一百二十四匹明宗嘉之賜紹魯竭忠建策與復功臣金紫光祿大夫檢校太保至四年八月其首領念公川來朝貢其年十月別部首領薛冀堆進狀乞授嵐州刺史明宗在藩時常與冀堆有舊欲許之樞密使安重誨力諫乃止長興元年三月竟以冀堆爲嵐州刺史仍賜名萬通清泰三年二月以寧朔奉化兩府畱後白可久超授檢校司徒副使赫連海龍檢校尚書左僕射兩府大夫李鐵匱檢校尚書右僕射晉天福元年高祖以契丹有助立之功割雁門以北及幽州之地以賂之由是吐渾部族皆隸于契丹其後苦契丹之虐政

部族皆怨之復爲鎮州節度使安重榮所誘乃背契丹率車帳羊馬取五臺路歸國契丹大怒以朝廷招納叛亡遣使責誚六年正月晉高祖命供奉官張澄各率兵二千搜索并鎮忻代四州山谷中吐渾還其舊地然亦以契丹誅求無厭心不平之命漢高祖出鎮太原潛加撫慰其年五月其大首領白承福及麾里念虎里赫連功德等來朝九月又遣首領白承福及麾里念虎里赫連契丹之好數召其酋長入朝厚加錫宴每大譙會皆命列坐於勛臣之次至開運中捍虜於澶州召承福等率其部衆從行屬歲多暑熱部下多死復遣歸太原移帳於嵐石州界然承福馭下無方多干軍令其子族白可久名在承福之亞因牧馬率本帳北遁契丹授以官爵復遣潛誘承福承福亦思叛去事未果漢祖知之乃以兵環其部族擒承福族與白鐵匱赫連海龍等五家凡四百餘人伏誅籍其牛馬命別部長王義宗統其餘屬

達靺鞨之遺種本在奚契丹之東北後爲契丹所攻而部族分散或屬契丹或屬渤海其別部散居陰山者

自號達靺當唐末以名見中國有每相溫于越相溫咸
通中從朱邪赤心討龐勛其後李國昌克用父子爲赫
連鐸等所敗嘗亡入達靺後從克用入關破黃巢由是
居雲代之間其俗善騎射畜多駝馬其君長部族名字
不可究見惟其嘗通于中國者可見云同光中都督折
文連數自河西來貢駝馬明宗討王都于定州都誘契
丹入寇明宗召達靺入契丹界以張軍勢遣宿州刺史
薛敬忠以所獲契丹團牌二百五十及弓箭數百賜雲
州生界達靺蓋唐常役屬之長興三年首領頡哥率其
族四百餘人來附訖于顯德常來不絕

党項西羌之遺種其國在禹貢析支之地東至松州西接葉護南界春桑北鄰吐渾有地三千餘里無城邑而有室屋以毛罽覆之其人喜盜竊而多壽往往至百五六十歲其大姓有細封氏費聽氏折氏野利氏拓拔氏爲最强唐德宗時党項諸部相率內附居慶州者號東山部落居夏州者號平夏部落部有大姓而無君長不相統一散處邠寧鄜延靈武河西東至麟府之間自同光以後大姓之强者各自來朝貢明宗時詔沿邊置場市馬諸夷皆入市中國而回鶻党項馬最多明宗招懷遠人馬來無駑壯皆售而所售常過直往來館給道路

倍費其每至京師明宗爲御殿見之勞以酒食旣醉連
袂歌呼道其土風以爲樂去又厚以賜賚歲耗百萬計
唐大臣皆患之數以爲言乃詔吏就邊場售馬給直止
其來朝而党項利其所得來不可止五代會要四年十
月勅沿邊藩鎮或
有蕃部賣馬可擇其良壯者給券具數以聞先是上問
見管馬數樞密使范延光奏天下常支草粟者近五萬
匹見今西北諸蕃賣馬者往來如市其郵傳之費市估
之直日四五千貫以臣計之國力十耗其七馬無所使
財賦漸銷朝廷甚非所利上善之乃降是勅冊府元
龜長興四年十月帝問見管馬數范延光奏曰天下常
支草粟者近五萬匹見今西北諸蕃部賣馬者往來如
市其郵傳之費中估之價日四五千貫以臣計之國力
十耗其七馬無所使財賦坐銷朝廷將不濟馮贇奏曰
金商州每年上供絹不過六百疋臣給馬價每日約支
五千餘疋臣等思惟無益之甚乞陛下深悟其理帝曰
卿等商略可否以聞延光等議戒緣邊鎮戍蕃部賣馬

卽擇其良壯給券
具數以聞從之

其在靈慶之間者數犯邊爲盜自河

西回鶻朝貢中國道其部落輒邀劫之執其使者賣之
他族以易牛馬明宗遣靈武康福邠州藥彥稠等出兵
討之福等擊破阿埋韋悉褒勒強賴埋厮骨尾及其大
首領連香李八薩王都統悉那埋摩侍御乞埋嵬悉逋
等族殺數千人獲其牛羊鉅萬計及其所劫外國寶玉
等悉以賜軍士由是党項之患稍息至周太祖時府州
党項尼也六泥香王子拓拔山等皆來朝貢廣順三年
慶州刺史郭彥欽貪其羊馬侵擾諸部獨野雞族強不
可近乃誣其族犯邊太祖遣使招慰之野雞族苦彥欽

不肯聽命太祖遣邠州折從阮寧州刺史張建武等討之建武勇于立功不能通夷情馳軍擊野雞族殺數百人而喜玉折思殺牛三族聞建武擊破野雞族各以牛酒犒軍軍士利其物反劫掠之三族共誘建武軍至包山度險三族共擊之軍投崖谷死傷甚衆太祖怒罪建武等選良吏爲慶州刺史以招撫之其他諸族散處沿邊界上者甚衆然其無國地君長故莫得而紀次云

五代

史党項其俗皆土著居有棟宇織毛罽以覆之尙武其人多壽至百五十六十歲不事生業好爲盜賊党項自同光以後大姓之强者各自來朝貢明宗時詔沿邊置場市馬諸夷皆入市中國有回鶻党項馬最多明宗招懷遠人馬來無駕壯皆集而所售過常直往來館給道路倍費其每至京師明宗爲御殿見之勞以酒食旣醉

連袂歌呼道其土風以爲樂去又厚以賜賚歲耗百萬計唐大臣皆患之數以爲言乃詔吏就邊場售馬給直止其來朝而党項利其所得來不可止其在靈慶之間者數犯其邊爲盜自河西回鶻朝貢中國道其部落輒邀劫之執其使者賣之他族以易牛馬明宗遣靈武康福邠州藥彥稠等出兵討之福等擊破阿埋韋悉褒勒強賴埋斲骨尾及其大首領連香李八薩王都統悉那埋摩侍御乞埋鬼悉逋等族殺數千人獲其牛羊鉅萬計及其所劫外國寶玉等悉以賜軍士由是党項之患稍息其他諸族散處沿邊界上甚衆然皆無國邑君長故莫得而紀次云五代會要党項羌古析支之地漢西羌之別種其地東至松州南接秦桑述桑諸羌北連吐谷渾處山谷間亘三千餘里種有數姓自爲部落一姓之中復分爲小部落有細封氏費聽氏析利氏野辭氏房當氏米禽氏拓拔最爲強族俗皆土著居有棟宇織毛罽以覆之其人多壽或至百五六十歲不事生業好爲盜竊前世或來朝貢自唐寶應貞元之後皆率部族內附居慶州號東山部落居夏州號平夏部落會昌初命三使以統之在寧延州界者命侍御史崔彥邠主之在夏州者命侍御史李霄主之在靈武麟勝州者命侍

御史鄭賀主之後唐同光二年二月遣使朝貢十二月
其首領簿備香來貢良馬天成二年九月河西党項如
連山等來朝貢進馬四十匹四年四月勅沿邊置場買
馬不許蕃部至闕下自上御極已來党項之衆競赴都
下賣馬嘗賜食于禁廷醉則連袂歌其土風凡將到馬
無驚良並云上進國家雖約其價直以給之然計其館
給賜資每年不下五六萬貫大臣以爲耗蠹中原無
甚于此因降勅止之雖有是命竟不能行其年九月首
領折遇明等來貢方物十月首領來有行來朝進馬四
十匹上御中興殿閱所進馬樞密使安重誨奏曰吐渾
党項近日相次進馬皆給價直對見之時別賜繪帛計
其所費不啻倍價請止之上以爲國家常苦馬不足每
錫賜常事不可以自止蕃部羊馬不絕於路長興元年
正月其首領來朝貢授萬德懷督簿備撤羅懷化司戈
其年十二月以党項折家族五顛都知兵馬使折之正
爲檢校尚書右僕射簿備家族都督簿備撤羅檢校工
部尚書二年正月首領折七移等進馳馬其年十二月
又遣首領來獻所奪得契丹旗號并馬等三年正月以
西路党項部族劫掠使臣及外域進奉命邠州節度使

藥彥稠靈武節度使康福等率步騎七千往方渠顛已來討其叛命者其年二月行營邠州節度使藥彥稠等奏誅党項阿埋三族韋悉褒勒疆賴埋厮骨尾屈悉保等十七族七百餘人又率兵自牛兒族入白魚谷追及背叛党項白馬慮家六族客戶三族獲大首領連香八薩王都統悉邠埋摩侍御乞埋鬼悉連等六人兼黨類二千餘人獲持馬牛羊數千計至晚師還野次其地無水軍士方渴俄有風雲自東而起是夜初更降雪一尺軍中以爲神助上令告捷使史萬山宣諭軍中所獲牛羊等物各令士卒自取勿得收斂以進奉爲名五代會要周廣順二年六月以府州党項泥也六族防禦使歸化將軍泥香王子又泥也大首領拓拔山並爲歸德將軍三年二月慶州刺史郭彥欽奏党項野雞族掠奪商旅請出兵討之時彥欽黥貨嗜其利以州地野雞族多羊馬作法擾之番情獷悍屢不從順乃誣奏之太祖遣中使齎詔撫安部族旣苦彥卿虐政不時報命遂詔邠州節度使折從阮合寧州刺史張建武兵進討之建武勇于立功徑趨野雞族追擊殺數十百人有喜王族折思族殺牛族從無猜貳間官軍討伐竟來餉餽官軍利其財貨皆劫掠之諸族乃相聚官軍至包山負險之

地逆戰敗之投崖谷死者甚衆折從阮保兵而退太祖
怒彥卿勒歸私第左遷建武爲率府率命前解州刺史
鄭元昭爲慶州刺史以招撫之

突厥國地君世部族名號物俗見于唐著矣至唐之末
爲諸夷所侵部族微散五代之際嘗來朝貢同光三年
渾解樓來天成二年首領張慕晉來長興二年首領杜
阿熟來天福六年遣使者薛同海等來凡四至其後不
復來然突厥于時最微又來不數故其君長史皆失不
能紀五代會要突厥之始前書載之備矣自號可汗猶
古之單于妻號可賀敦猶古之閼氏也子弟謂之
特勒別部領兵者皆謂之設其大官屈律啜次阿婆次
頡利法次吐屯次俟斤並代居其官而無員數父兄死
則子弟襲其位北番之中最爲強盛至唐室末爲諸番
所侵部族微弱亦嘗來朝貢後唐天成二年正月其首

領張慕晉朝貢長興二年正月其首領杜阿熟來朝貢
晉天福六年七月其首領遣使薛同海已下一十七人
來朝貢

吐蕃國地君世部族名號物俗見于唐著矣當唐之盛
時河西隴右三十三州涼州最大土沃物繁而人富樂
其地宜馬唐置八監牧馬三十萬匹以安西都護府羈
縻西域三十六國唐之軍鎮監務三百餘城常以中國
兵更戍而涼州置使節度之安祿山之亂肅宗起靈武
悉召河西兵赴難而吐蕃乘虛攻陷河西隴右華人百
萬皆陷于虜文宗時常遣使者至西域見甘涼瓜沙等
州城邑如故而陷虜之人見唐使者夾道迎呼涕泣曰

皇帝猶念陷蕃人民否其人皆天寶中陷虜者子孫其
言語稍變而衣服猶不改至五代時吐蕃已微弱回鶻
党項諸羌夷分侵其地而不有其人民值中國衰亂不
能撫有惟甘涼瓜沙四州常自通于中國甘州爲回鶻
牙而涼瓜沙三州將吏猶稱唐官數來請命自梁太祖
時常以靈武節度使兼領河西節度而觀察甘肅威等
州然雖有其名而涼州自立守將唐長興四年涼州畱
後孫超遣大將拓拔承謙及僧道士耆老楊通信等至
京師求旌節明宗問孫超等世家承謙曰吐蕃陷涼州
張掖人張義朝募兵擊走吐蕃唐因以義朝爲節度使

發鄆州兵二千五百人戍之唐亡天下亂涼州以東爲突厥党項所隔鄆兵遂畱不得返今涼州漢人皆其戍兵子孫也明宗乃拜孫超節度使清泰元年畱後李文謙來請命後數年涼州人逐出文謙靈武馮暉遣牙將吳繼勲代文謙爲畱後是時天福七年明年晉高祖遣涇州押牙陳延暉賞詔書安撫涼州涼州人共劫畱延暉立以爲刺史至漢隱帝時涼州畱後折逋嘉施來請命漢卽以爲節度使嘉施土豪也周廣順二年嘉施遣人市馬京師因來請命帥是時樞密使王峻用事峻故人申師厚者少起盜賊爲兗州牙將與峻相友善後峻

貴師厚弊衣蓬首日候峻出拜馬前訴以飢寒峻未有以發而嘉施等來請帥峻卽建言涼州深入夷狄中國未嘗命吏請募率府率供奉官能往者月餘無應募者乃奏起師厚爲左衛將軍已而拜河西節度使師厚至涼州奏薦押牙副使崔虎心陽妃谷首領沈念般等及中國畱人子孫王廷翰溫崇樂劉少英爲將吏又自安國鎮至涼州立三州以控扼諸羌用其酋豪爲刺史然涼州夷夏雜處師厚小人不能撫有至世宗時師厚畱其子而逃歸涼州遂絕于中國獨瓜沙二州終五代常來沙州梁開平中有節度使張奉自號金山白衣天子

至唐莊宗時回鶻來朝沙州畱後曹義金亦遣使附回鶻以來莊宗拜義金爲歸義軍節度使瓜沙等州觀察處置等使晉天福五年義金卒子元德立至七年沙州曹元忠瓜州曹元深皆遣使來周世宗時又以元忠爲歸義軍節度使元恭爲瓜州團練使其所貢礪砂羚羊角波斯錦安西白氍金星礪胡桐律大鵬砂眊褐玉團皆因其來者以名見而其卒立世次史皆失其紀而吐蕃不見于梁世唐天成三年回鶻王仁喻來朝吐蕃亦遣使附以來自此數至中國明宗嘗御端明殿見其使者問其牙帳所居曰西去涇州二千里明宗賜以虎皮

人一張皆披以拜委身宛轉落其氈帽髮亂如蓬明宗

及左右皆大笑至漢隱帝時猶來朝後遂不復至史亦

失其君世云

五代史吐蕃本漢西羌之地或云南涼禿髮利鹿孤之後其子孫以禿髮爲國號語

訛爲吐蕃國人號其主爲贊普置大論小論以理國事其俗隨畜牧無常居然亦有城郭都城號邏些城不知節候以麥熟爲歲首唐時屢爲邊患初唐分天下爲十道河西隴右三十三州涼州最爲大鎮天寶置八監牧馬三十萬又置都護以控制之安祿山之亂肅宗在靈武悉召河西戍卒收復兩京吐蕃乘虛取河西隴右華人百萬皆陷于吐蕃開成時朝廷嘗遣使至西域見甘涼瓜沙等州城邑如故陷吐蕃之人見唐使者旌節夾道迎呼涕泣曰皇帝猶念陷蕃生靈否其人皆天寶中陷吐蕃者子孫其語言小說而衣服未改至五代時吐蕃已微弱回鶻党項諸羌夷分侵其地而不有其人民值中國衰亂不能撫有惟甘涼瓜沙四州常自通于中國甘州爲回鶻牙帳而涼瓜沙三州將吏猶稱唐官數來請命自梁太祖時常以靈武節度使兼領河西節度

而觀察甘肅威等州然雖有其名而涼州自立守將唐
長興四年涼州畱後孫超遣大將拓拔承謙及僧道士
耆老楊通信等至京師明宗拜孫超節度使清泰元年
畱後李文謙來請命後數年涼州人逐出文謙靈武馮
暉遣牙將吳繼興代文謙爲畱後是時天福七年明年
晉高祖遣涇州押牙陳延暉賁詔書安撫涼州涼州人
共劫畱延暉立以爲刺史至漢隱帝時涼州畱後折逋
嘉施來請命漢卽以爲節度使嘉施土豪也周廣順二
年嘉施遣人市馬京師是時樞密使王峻用事峻故人
申師厚者少起盜賊爲兗州牙將與峻相友善後峻貴
師厚弊衣蓬首日候峻出馬前訴以飢寒峻未有以發
而嘉施等來請帥峻卽建言涼州深入夷狄中國未嘗
命吏請募帥府率供奉官能往者月餘無應募者乃奏
起師厚爲左衛將軍已而拜河西節度使師厚至涼州
奏薦押牙副使崔虎心陽妃谷首領沈念般等及中國
畱人子孫王廷翰溫崇劉少英爲將吏又自安國鎮
至涼州立三州以控扼諸羌用其酋豪爲刺史然涼州
夷夏雜處師厚小人不能撫有至世宗時師厚畱其子
而逃歸涼州遂絕于中國獨瓜沙二州終五代常來沙
州梁開平中有節度使張奉自號金山白衣天子至唐

莊宗時回鶻來朝沙州留後曹義金亦遣使附回鶻以
來莊宗拜義金爲歸義軍節度使瓜沙等州觀察處置
等使晉天福五年義金卒子元德立至七年沙州曹元
忠瓜州曹元深皆遣使來周世宗時又以元忠爲歸義
軍節度使元恭爲瓜州團練使其所貢礪砂羚羊角波
斯錦安西白氍毹金星礪砂大鵬砂耗褐玉團皆因其來者
以名見而其卒立世次史皆失其紀而吐蕃亦遣使附以來
世唐天成三年回鶻王仁裕來朝吐蕃亦遣使附以來
自此數至中國明宗嘗御端明殿見其使者問其牙帳
所居曰西去涇州三千里明宗賜以虎皮人一張皆披
以拜委身宛轉落其氍毹帽髮亂如蓬明宗及左右皆大
笑至漢隱帝時猶來朝後遂不復至史亦失其君世云
五代會要吐蕃在長安西八千里本漢西羌之地其
種落莫知所出或云南涼秃髮利鹿孤之後其子孫以
秃髮爲國號語訛謂之吐蕃國人號其王爲贊普置大
論小論以統理國事無文紀刻木爲約其國王與臣下
一年一小盟三年一大盟其俗隨畜牧不常其居然亦
有城郭都城號還步城屋皆平頭貴人處於大氊帳謂
之排盧不知節候以麥熟爲歲首唐貞觀中常來朝貢
自後吞併諸蕃兵力日盛屢爲邊患河西隴右之地悉

爲所取至大中初其國亂朝廷復得六關之地至唐室
未又爲侵據唐分天下爲十道河西隴右三十三州涼
州最爲大鎮土地沃壤人物繁庶開元天寶中置入監
牧馬三十萬雜畜稱是其西復置安西都護府距長安
入千里羈縻西番三十國軍鎮監務大小三百餘戍守
之兵皆取涼州節度及安祿山犯關肅宗在靈武盡召
西河戍卒收復兩京吐蕃乘虛遂取涼隴華人百萬陷
于吐蕃開成之際朝廷遣使還番過涼肅瓜沙城邑如
故華人見漢旌使夾道泣訴問皇帝還念陷番生靈否
當時已經再世雖語言小訛而衣服未改至今涼州漢
戶猶稱上代是鄆州戍卒每帥守闕則請命於朝廷梁
開平二年正月遣使朝貢二月以吐蕃入朝使嘔未首
領社論悉伽社論心爲左領軍衛將軍同正嘔未蘇論
乞祿爲右領軍衛將軍同正乾化元年十一月又遣使
來朝召對于朝元殿賜金帛等遣之後唐天成二年十
一月遣使野利延孫等入貢并番僧四人持番書二封
人莫識其字二年正月以入朝使野利延孫等六人並
爲歸德將軍其年九月又遣使朝貢以入朝使閻薛羅
等三人並爲歸德司戈十二月又以入朝使薛竭薛王
子撥邕爲歸德郎將首領十人並爲歸化司戈四年九

月西涼府番官播心等來朝十月首領撥里忙布闊遣
等來朝並授歸德司戈長興三年二月又遣使朝貢三
月以朝貢使左廂首領野利間心爲歸德大將軍右廂
首領錢心爲歸化郎將軍中廂首領李讀等並爲歸德
司侯重云都督對兒六突兒雞等並爲歸德司陞其年
十月復遣使入朝引對於端明殿問本番牙帳去京師
遠近對曰在涇州西二千里四年十一月遣使來貢召
對於內殿賜以金帛仍各賜虎皮一張晉天福四年十
月罷延族大首領聶褒郎彝磨標昌訶尤羅祇褒等率
其族朝貢周廣順二年九月河西節度使申師厚奏吐
蕃首領折逋支等請加恩命其月勅以吐蕃左廂押番
副使折逋支右廂崔虎心並授銀青光祿大夫檢校工
部尚書楊妃谷大首領沈念般授懷化大將軍左廂大
首領錢千悶篤爲歸德大將軍沒林葛于凝盧伴邈折
逋窮羅並爲懷化大將軍右廂大首領鹿悉迦阿羅岳
騷奴並爲歸德大將軍沈念般批與龍文溫元積並爲
懷化大將軍中廂首領岳阿西安九十並爲懷化大將
軍又奏自涇州安國鎮至西涼府沿路三處控扼各立
州名欲補大首領爲刺史又管州界部落大首領三十
餘人名賜空名告身並從之

太平寰宇記沙州周顯

德二年其州可汗沙州節度觀察使畱後曹元忠各遣使進方物其外瓜州團練使仍舊隸沙州以歸義軍節度觀察畱後曹元忠爲節度使以知瓜州軍事曹元恭爲瓜州團練使仍各鑄印以賜之皆旌來王之意也東都事畧西蕃蓋出南梁禿髮利鹿孤之後在唐爲吐蕃安史之亂遂陷河西隴右之地大中三年其國宰相論恐熱以秦原安樂及石門等七關來歸四年克成維扶三州五年張義朝以瓜沙伊肅十一州來獻唐末瓜沙之地復爲所隔然其國亦自衰弱族種分散無復統一方五代之際有孫超者一嘗遣人入貢唐明宗以爲河西軍畱後超死州人推其土人折蒲嘉施繼爲畱後至周太祖始命申師厚爲河西節度使顯德中師厚不能撫有其衆逃歸涼州自是不復命帥文獻通考梁開平二年遣使朝貢官其首領後唐天成二年遣使野利延孫等入貢并蕃僧四人持番書二封人莫識其字其後權知西涼府畱後孫超遣大將拓拔承誨來貢明宗召見承誨云涼州東距靈武千里西北至甘州五百里舊有鄆人二千五百爲戍卒及黃巢之亂遂爲阻絕今城中漢戶百餘皆戍兵之子孫衣服言語畧如漢人又言涼州郭外數十里尙有漢民陷沒者耕作餘皆吐

蕃詔授超涼州刺史河西軍節度使畱後漢乾祐初超
率州人推其土人折逋嘉施權知畱後遣使來貢卽以
嘉施代超爲畱後周廣順二年始以申師厚爲河西節
度師厚初至涼州奏授吐蕃首領折逋支等官從之顯
德中師厚爲其所迫擅還
朝坐貶涼州亦不復命帥

回鶻爲唐患尤甚其國地君世物俗見于唐著矣唐嘗
以女妻之故其世以中國爲舅其國本在娑陵水上後
爲黠戛斯所侵徙天德振武之間又爲石雄張仲武所
破其餘衆西徙役屬吐蕃是時吐蕃已陷河西隴右乃
以回鶻散處之當五代之際有居甘州西州者嘗見中
國而甘州回鶻數至猶呼中國爲舅中國答以詔書亦
呼爲甥梁乾化元年遣都督周易言等來而史不見其

君長名號梁拜易言等官爵遣左監門衛上將軍楊沼
押領還蕃至唐莊宗時王仁美遣使者來貢王馬自稱
權知可汗莊宗遣司農卿鄭續持節冊仁美爲英義可
汗是歲仁美卒其弟狄銀立遣都督安千想等來同光
四年狄銀卒阿咄欲立天成二年權知國事王仁裕遣
李阿山等來明宗遣使者冊仁裕爲順化可汗晉高祖
時又冊爲奉化可汗阿咄欲不知其爲狄銀親疎亦不
知其立卒而仁裕訖五代常來朝貢史亦失其紀其地
出玉犂牛綠野馬獨峯駝白貂鼠羚羊角礪砂脛膈臍
金剛鑽紅鹽屬毼駒駝之草其地宜白麥青麴麥黃麻

慈葑胡荽以橐駝耕而種其可汗常樓居妻號天公主
其國相號媚祿都督見可汗則去帽披髮而人以爲禮
婦人總髮爲髻高五六寸以紅絹囊之旣嫁則加氍帽
又有別族號龍家其俗與回紇小異長興四年回鶻來
獻白鶻一聯明宗命解縹放之自明宗時常以馬市中
國其所賣寶玉皆鬻縣官而民犯禁爲市者輒罪之周
太祖時除其禁民得與回鶻私市玉價由此倍賤顯德
中來獻玉世宗曰玉雖寶而無益却之五代史回鶻其
先匈奴之種也
後魏時號爲鐵勒亦名回紇唐元和四年本國可汗遣
使上言改爲回鶻義取迴旋搏擊如鶻之迅捷也本牙
在天德西北娑陵水上距京師八千餘里唐天寶中安
祿山犯闕有助國討賊之功累朝尚主自號天驕大爲

唐朝之患會昌初其國爲黠戛斯所侵部族擾亂乃移帳至天德振武間時爲石雄劉沔所襲破之復爲幽州節度使張仲武所攻餘衆西奔歸于吐蕃吐蕃處之甘州由是族帳微弱其後時通中國世以中國爲舅朝廷每賜書詔亦嘗以甥呼之梁乾化元年十一月遣都督周易言等人朝進貢太祖御朝元殿引對以易言爲右監門衛大將軍同正以石壽兒石論思並爲右千牛衛將軍同正仍以左監門衛將軍楊沼充押領回鶻還蕃使通事舍人仇元通爲判官厚賜繒帛放令歸國又賜其入朝僧疑盧宜李思宜延錢等紫衣後唐同光二年四月其本國權知可汗仁美遣都督李引釋迦副使鐵林都監楊福安等共六十六人來貢方物并獻善馬九匹莊宗召對于文明殿乃命司農卿鄭績將作少監何延嗣持節冊仁美爲英義可汗至其年十一月仁美卒其弟狄銀嗣立遣都督安千等來朝貢狄銀卒阿咄欲立亦遣使來貢名馬天成三年二月其權知可汗仁裕遣都督李阿山等一百二十人入貢明宗召對于崇元毀賜物有差其年三月命使冊仁裕爲順化可汗四年又遣都督掣撥等五人來朝授掣撥等懷化司戈遣令還蕃長興元年十二月遣使翟未思三十餘人進馬八

十匹玉一團四年七月復遣都督李未等三十人來朝
進白鵲一聯明宗召對于廣壽殿厚加錫賚仍命解放
其鵲清泰二年七月遣都督陳福海已下七十八人進
馬三百六十匹玉二十團八月勅回鵲朝貢使密祿都
督陳福海可懷化郎將副使達奚相溫可懷化司階監
使屈密錄阿撥可歸德司戈判官安均可懷化司戈晉
天福三年十月遣使都督李萬全等朝貢以萬全爲歸
義大將軍監使雷福德爲順化將軍四年三月又遣都
督拽里敦來朝兼貢方物其月命衛尉卿邢德昭持節
就冊爲奉化可汗五年正月遣都督石海金等來貢良
馬百駟并白玉團白玉鞍轡等謝其封冊漢乾祐元年
五月遣使李屋等入朝貢馬并白玉藥物等七月以入
朝使李屋爲歸德大將軍副使安鐵山監使朱相溫爲
歸德將軍判官翟毛哥爲懷化將軍周廣順元年二月
遣使并摩尼貢玉團七十有七白氍毹貂皮羴牛尾藥物
等先是晉漢已來回鵲每至京師禁民以私衷市易其
所有寶貨皆鬻之入官民間市易者罪之至是周太祖
命除去舊法每回鵲來者聽私下交易官中不得禁詰
由是玉之價直十損七八顯德六年二月又遣使朝貢
獻玉并硃砂等物皆不納所入馬量給價錢時世宗以

玉雖稱寶無益國用故因而却之五代會要回鶻本
牙在天德西北娑陵水上距長安六千九百里唐天寶
中安祿山犯關有助國討賊之功累朝尚主自號天驕
會昌初其國爲黠戛斯所侵部族擾亂乃移帳至天德
振武間又爲石雄劉沔所襲破之復爲幽州節度使張
仲武所攻餘衆西奔歸于吐蕃吐蕃處之甘州其後時
通中國世以中國爲舅朝廷每賜書詔亦書以甥呼之
梁乾化元年十一月遣都督周易言等入朝進貢太祖
御朝元殿引對以易言爲右監門衛大將軍同正弟略
麥之石論思並爲左千牛衛將軍同正李屋珠安盟上
並爲右千牛衛將軍同正仍以左監門衛上將軍楊沼
爲左驍衛上將軍充押領迴鶻還蕃使通事舍人仇元
通爲判官厚賜繪帛押領歸國又賜其入朝僧凝盧宜
年思宜延錢等紫衣後唐同光二年四月其本國權知
可汗仁美遣都督李引釋迦副使田鐵林都監楊福安
等共六十六人來貢方物并獻善馬九匹莊宗召對於
文明殿仍命司農卿鄭質將作少監何延嗣持節冊仁
美爲英義可汗至其年十一月仁美卒其弟狄銀嗣立
遣都督安千等來朝貢狄銀卒阿咄欲立亦遣使來貢
名馬天成三年二月其權知可汗仁裕遣都督李阿山

等一百二十人入貢明宗召對于崇元殿賜物有差其
年三月命使冊仁裕爲順化可汗四年又遣都督掣撥
等五人來朝貢授掣撥等懷化司戈遣令還長興元年
十二月遣使翟來思三十餘人進馬八十匹玉一團四
年七月復遣都督李未等三十人入朝進白鶻一聯明
宗復召對于廣壽殿厚加錫賚仍命解放其鶻清泰二
年七月遣都督陳福海已下七十人進馬三百六十四
王二十團至八月勅迴鶻朝貢使密都陳福海可懷化
郎將副使達奚相溫可懷化司階監使屈密錄阿撥可
歸德司戈判官安均可懷化司戈晉天福三年十月遣
使都督李萬全等朝貢以萬全爲歸義大將軍監使雷
福德爲順化將軍四年三月又遣都督拽里敦來朝兼
貢方物其月命衛尉卿邢德昭持節就冊爲奉化可汗
貢良馬百匹白玉團白玉鞍轡等謝其封冊漢乾祐元
年五月遣使李屋等入朝貢方物並白玉藥物等七月
以入朝使李屋爲歸德大將軍副使安鐵山監使朱相
溫並爲歸德將軍判官翟毛歌爲懷化將軍周廣順元
年二月遣使并摩尼貢玉團七十七白氍毹麋牛尾藥
物等先是晉漢已來迴鶻每至京師禁民勿私相易其
所有寶貨皆中賣入官私下市易者罪之至是太祖命

除去舊法每迴鶻來者私下交易官中更不禁詰由是王之價直十損七八顯德六年二月又遣使朝貢獻玉并礪砂等物皆不納所入馬量給價錢時上以玉雖寶珍無益國用故因而却之

于闐國地君世物俗見于唐五代亂世中國多故不能撫來四夷其常自通于中國者僅以名見其君世始終皆不可知而于闐尤遠去京師萬里外其國西南近葱嶺與婆羅門爲隣國而相去猶三千餘里南接吐蕃西北至疎勒二千餘里晉天福三年于闐國王李聖天遣使者馬繼榮來貢紅鹽鬱金羖牛尾玉氍毹等晉遣供奉官張匡鄴假鴻臚卿彰武軍節度判官高居誨爲判官冊聖天爲大寶于闐國王是歲冬十二月匡鄴等自靈

州行二歲至于闐至七年冬乃還而居誨頗記其往復
所見山川諸國而不能道聖天世次也居誨記曰自靈
州過黃河行三十里始涉沙入党項界曰細腰沙神點
沙至三公沙宿月支都督帳自此沙行四百餘里至黑
堡沙沙尤廣遂登沙嶺沙嶺党項牙也其酋曰捻崖天
子渡白停河至涼州自涼州西行五百里至甘州甘州
回鶻牙也其南山百餘里漢小月支之故地也有別族
號鹿角山沙陀云朱耶氏之遺族也自甘州西始涉磧
磧無水載水以行甘州人教晉使者作馬蹄木澁木澁
四竅馬蹄亦鑿四竅而綴之駝蹄則包以羴皮乃可行

西北五百里至肅州渡金河西百里出天門關又西百里出玉門關經吐蕃界吐蕃男子冠中國帽婦人辮髮戴瑟瑟珠云珠之好者一珠易一良馬西至瓜州沙州二州多中國人聞晉使者來其刺史曹元深等郊迎問使者天子起居瓜州南十里鳴沙山云冬夏殷殷有聲如雷云禹貢流沙也又東南十里三危山云三苗之所竄也其西渡都鄉河曰陽關沙州西曰仲雲族其牙帳居胡盧磧云仲雲者小月支之遺種也其人勇而好戰瓜沙之人皆憚之胡盧磧漢明帝時征匈奴屯田于吾盧蓋其地也地無水而常寒多雪每天暖雪銷乃得水

匡鄴等西行入仲雲界至大屯城仲雲遣宰相四人都督三十七人候晉使者匡鄴等以詔書慰諭之皆東向拜自仲雲界西始涉醴磧無水掘地得濕沙人置之胸以止渴又西渡陷河伐檉置水中乃渡不然則陷又西至紺州紺州于闐所置也在沙州西南云去京師九千五百里矣又行二日至安軍州遂至于闐聖天衣冠如中國其殿皆東向曰金冊殿有樓曰七鳳樓以蒲桃爲酒又有紫酒青酒不知其所釀而味尤美其食粳沃以蜜粟沃以酪其衣布帛有園圃花木俗喜鬼神而好佛聖天居處嘗以紫衣僧五十人列侍其年號同慶二十

九年其國東南曰銀州盧州涇州其南千三百里曰玉
州云漢張騫所窮河源出于闐而山多玉者此山也其
河源所出至于闐分爲三東曰白玉河西曰綠玉河又
西曰烏玉河三河皆有玉而色異每歲秋水涸國王撈
玉于河然後國人得撈玉自靈州渡黃河至于闐往往
見吐蕃族帳而于闐常與吐蕃相攻擊匡鄴等至于闐
聖天頗責誚之以邀誓約匡鄴等還聖天又遣都督劉
再昇獻玉千斤及玉印降魔杵等漢乾祐元年又遣使
者王知鐸來

五代史于闐其俗好事鬼神 五代會要

于闐在京師西九千九百餘里西南帶蔥

嶺與婆羅門相接去三千里餘南與吐蕃接西北至疎勒國二千餘里國域之東有白玉河南有綠玉河次西

有鳥玉河其源同出于崑岡山去于闐西一千三百餘里每歲至七八月小水之後取玉於河謂之撈玉官取之後方許私取禁令甚嚴地多蒲萄醞而爲酒味極醇美其俗好事妖神唐正觀中其王伏闐信來朝復遣子入宿衛其後亦時來朝貢晉天福三年九月其王李聖天遣使馬繼榮進白玉白氍毹牛尾紅鹽鬱金礪砂大鵬砂玉裝靴轡等物其年十月冊聖天爲大寶于闐國王命供奉官張匡鄴爲國信使仍授人朝使馬繼榮爲鎮國大將軍扶風郡開國公食邑二千戶副使黃門將軍張載通試衛尉卿殿頭承旨通事舍人吳順規試將作少監漢乾祐元年五月復遣使朝貢六月以入朝使王知鐸爲檢校司空副使張文華判官秦元寶爲檢校左右僕射監使劉行立檢校兵部尚書游官紀聞晉天福中高居誨從使于闐爲判官作記紀其采玉處云玉河在國城外源出崑山西流三千餘里至國界牛頭山分爲三日白玉河在城東三十里曰綠玉河在城西二十里曰烏玉河在綠玉河西七里源雖異玉隨地變故色不同每歲五六月水暴漲玉隨流至多寡由水細大水退乃可取方言曰撈玉國主未采禁人至河濱

高麗本扶餘之別種也其國地君世見于唐比他夷狄有姓氏而其官號略可曉其義當唐之末其王姓高氏同光二年遣使廣評侍郎韓申一副使春部少卿朴嚴來而其國王姓名史失不紀至長興三年權知國事王建遣使者來明宗乃拜建元菟州都督充大義軍使封高麗國王建高麗大族也開運二年建卒子武立乾祐四年武卒子昭立王氏三世終五代常來朝貢其立也必請命中國中國常優答之其地產銅銀周世宗時遣尙書水部員外郎韓彥卿以帛數千匹市銅于高麗以鑄錢六年昭遣使者貢黃銅五萬斤高麗俗知文字喜

讀書昭進別叙孝經一卷越王新義八卷皇靈孝經一

卷孝經雌圖一卷別叙叙孔子所生及弟子事迹越王

新義以越王爲問目若今正義皇靈述延年辟穀雌圖

載日食星變皆不經之說

五代史高麗本扶餘之別種其國都平壤城卽漢樂浪郡

之故地在京師東四千餘里東渡海至于新羅西北渡遼水至于營州南渡海至于百濟北至靺鞨東西三千一百里南北二千里其官大者號大對盧比一品總知國事三年一代若稱職者不拘年限對盧已下官總十二級外置州縣六十餘大城置僊薩一人比都督小城置道使一人比刺史其下各有僚佐分曹掌事其王以白羅爲冠白皮小帶咸以金飾唐貞觀末太宗伐之不

能下至總章初高宗命李勣率軍征之遂拔其城分其地爲郡縣及唐之末年中原多事其國遂自立君長前

王姓高氏唐同光天成中累遣使朝貢周顯德六年高麗遣使貢紫白水晶二千顆

五代會要高麗本扶餘之別種其國都平壤城卽漢樂浪郡之故地在京師東

五千一百里東渡海至于新羅西北渡遼水至于營州
南渡海至于百濟北至靺鞨東西三千一百里南北一
千里其官大者號大對盧比一品總知國事三年一代
若稱職者不拘年限對盧已下官總十二級置外州縣
六十餘大城置僦薩一人比都督小城置通使一人比
刺史其下各有僚佐分曹掌事其王以白羅爲冠白皮
小帶咸以金飾其俗多淫祀事靈星可汗箕子等神國
城東有大隧名曰隧神常以十月王自祭之俗好經書
至于庶賤之家各有衢路造大屋謂之局堂子孫晝夜
讀書習射前王姓高氏世通中國常遣使朝貢後唐同
光三年十一月遣使廣許侍郎上柱國韓申一副使春
部少卿朴嚴來貢方物至四年正月授韓申一朝散大
夫試殿中監朴嚴朝散郎試秘書郎又天成三年二
月十二日學士院記事樞密院近送到權知高麗國諸
軍事王建表令賜詔書者其高麗國未曾有人使到闕
院中並無彼國詔書式樣未審呼卿呼汝兼使何色紙
書寫及封裏事例伏請特賜參酌詳定報院者中書帖
太常禮院體析中堂據狀申謹按本朝太宗皇帝親平
其國後不立後嗣是以祇書新羅國請約賜新羅國王
書詔體樣脩寫奉勅賜高麗國書詔宜依賜新羅渤海

兩蕃書詔體樣脩寫 又天成四年八月復遣廣評侍
郎張玢等五十二人來朝貢銀香獅子銀鑪金裝釵鏤
雲星刀劍馬匹金銀鷹繒鞞白紵白氍毹頭髮人參香油
銀鏤剪刀鉗鉞松子等長興三年二月復遣使大相王
儒來朝其年六月以權知國事王建爲特進檢校太保
使持節元菟州都督充大義軍使兼御史大夫上柱國
高麗國王七月又以其妻柳氏爲河東郡夫人清泰二
年十二月遣使禮賓卿邢順等來朝貢三年正月以入
朝使禮賓卿邢順試將作少監副使崔遠試少府監主
簿其年又遣使王子大相王規等來貢方物以大相王
規爲檢校尚書右僕射副使廣評侍郎崔禹試將作監
其隨行節級等三十餘人並授司戈司司陞等職晉天福
三年八月青州奏高麗國宿衛質子王仁翟乞放歸鄉
里從之四年九月復遣廣評侍郎邢順等七十二人來
貢方物六年八月其國王建爲開府儀同三司檢校太
師使持節元菟州都督充大義軍使高麗國王命國子
博士謝攀持節就冊之八年復遣太子大相王申一等
來開運元年正月以入朝使王子大相王守倉部令上柱
國賜紫金魚袋王申一爲檢校尚書右僕射正朝守廣
評侍郎柱國丹金魚袋柳迥訓檢校禮部尚書守廣評

郎中韓李康試衛尉卿守廣評郎中朴元信試太府少卿守兵部主事韋安試將作監主簿以進奉賀登極使正朝前守廣評侍郎柱國丹金魚袋金仁逢可檢校工部尚書副使禮賓卿柱國丹金魚袋金裕可試太府卿判官兵部郎中張規可試衛尉少卿二年其國王王建卒其子武嗣位十月遣使廣評侍郎朝立珪副使前禮賓卿金廉等一十八人來朝十二月以權知高麗國事王武爲特進檢校太保使持節元菟州都督充大義軍使兼御史大夫高麗國王仍命光祿卿范光政太子洗馬張李凝就行冊命王武者王建之子本國中大族國中推而爲主有智兵力日盛以兵并三韓百濟之地東夷君長最爲雄盛漢乾祐末王武死其子王昭代立周廣順元年正月遣廣評侍郎徐逢等九十七人來朝貢二月以權知高麗國軍事王昭爲特進檢校太保使持節元菟州都督充大義軍使兼御史大夫高麗國王仍命衛尉卿劉皞通事舍人顧彥浦持節冊之劉皞尋卒於路顧彥浦溺海而死二年九月復以太僕少卿王演借衛尉卿充高麗國冊禮使右衛率府呂繼贊借將作少監充副使顯德二年十月復遣使王子大相王融來貢方物又遣廣評侍郎荀質來賀登極其年十二月授其

國王王昭開府儀同三司檢校太師高麗國王五年六月命尚書水部員外郎韓彥卿尙輦奉御金彥英使於高麗因命賫帛數千匹就彼市銅以備鑄錢之用六年正月又遣其臣王子佐丞王兢佐伊王甫魏光等貢名馬織成衣襖弓劍等其年八月遣使進別序孝經一卷越王新義孝經八卷皇靈孝經一卷孝經雌圖三卷別序者記孔子所生及弟子從學之事新義者王爲問目以釋疏文之是非皇靈者止說延年辟災之事及志符文乃道書也雌圖者止說月之環暈星之彗孛乃識緯之書也陸游南唐書高麗傳高麗至五代初名曰大封其王高氏名躬父躬父晚年果於誅殺吳順義二年當梁之龍德二年爲海軍統帥王建所殺建自立去大封之名復稱高麗以開州爲東京平壤爲西京吳天祚二年當晉之天福元年敗新羅百濟于是倭耽浮驩於羅鐵勒東夷諸國皆附之有二京六府九節度百二十郡內列十省四部官服紫丹緋綠青碧青碧以年序遷緣以上選才能賜之俸祿賦以田租尙冠禮略如古制婚姻男女執手自相媒許俗重匾頭生男旦旦按壓其首惟恐不匾也昇元二年遣使來貢方物所上書稱牋儀式如表而不稱臣烈祖御武功殿設細仗見其使自

言代主朝覲拜舞甚恭宴于崇英殿出龜茲樂作番戲
召學士承旨孫忌侍宴三年又遣其廣評侍郎柳勲律
來貢方物其後史冊殘闕來與否不可考矣通鑑注
宋白曰晉天福中有西域僧襍羅來朝善火卜俄辭高
祖請遊高麗王建甚禮之時契丹併渤海之地有年矣
建因從容謂襍羅曰渤海本吾親戚之國其王爲契丹
所虜吾欲爲朝廷攻而取之且欲平其舊怨師迴爲言
於天子當定期兩襲之襍羅還具奏高祖不報出帝與
契丹交兵襍羅復奏之帝遣郭仁遇飛詔諭建深攻其
地以牽脅之會建已卒武知國事與其父之大臣不叶
自相魚肉內難稍平兵威未振且夷人怯懦襍羅之言
皆建虛誕耳清異錄後唐時高麗遣其廣評侍郎韓
申一來申一通書史臨回召對便殿出新貢林慮漿面
賜之又同光年高麗行人至副使者春部少卿上柱
國朴崑叟文雅如中朝賢士旣行吏掃除其館舍得餘
燭半挺其末紅印篆文曰光濟叟叟蓋以命燭也文
昌雜錄熙寧中王微病詔醫官馬世長往治之歸得東
觀漢記七冊彼亦自無完本然俗好經書至於庶賤之
家各於衢路造大屋謂
局堂子弟晝夜誦讀云

渤海本號靺鞨高麗之別種也唐高宗滅高麗徙其人散處中國置安東都護府于平壤以統治之武后時契丹攻北邊高麗別種大乞乞仲象與靺鞨酋長乞四比羽走遼東分王高麗故地武后遣將擊殺乞四比羽而乞乞仲象亦病死仲象子祚榮立因并有比羽之衆其衆四十萬人據挹婁臣于唐至中宗時置忽汗州以祚榮爲都督封渤海郡王其後世遂號渤海其貴族姓大氏

松漠紀聞渤海國去燕京女真所都各一千五百里以石累城足東並海其王舊以大爲姓

開平

元年國王大諲譔遣使者來訖顯德常來朝貢其國土物產與高麗同諲譔世次立卒史失其紀

五代史渤海靺鞨其俗呼

其王爲可毒失對面呼聖牋奏呼基下父曰老王母曰
太妃妻曰貴妃長子曰副王諸子曰王子世以大氏爲
酋長五代會要渤海靺鞨本高麗種唐德章中高宗
平高麗徙其人散居中國置州縣于遼外就平壤城置
安東都護府以統之至萬歲通天中契丹李萬榮反攻
陷營府有高麗別種大舍利乞乞仲象大姓舍利官乞
乞仲象名也與靺鞨反人乞四比羽走保遼東分王高
麗故地則天封乞四比羽許國公大舍利乞乞仲象震
國公乞四比羽不受命則天命將軍李楷固臨陳斬之
時乞乞仲象已死其子大祚榮繼立并有比羽之衆勝
兵丁戶四十餘萬保據邑婁故地至聖歷中稱臣朝貢
中宗命侍御史張行岌就往宣慰號其都爲忽汗州以
祚榮爲忽汗州都督封渤海郡王國自稱渤海其俗呼
其王爲可毒失對面呼聖王牋表呼基下父曰老王母
曰太妃妻曰貴妃長子曰副王諸子曰王子代以爲大
酋終唐室朝貢不絕梁開平元年五月其王大誣謾遣
王子大昭順來貢方物至二年又遣殿中少令崔禮光
來朝三年三月遣其相大誠諤來朝兼貢女口乾化二
年五月又遣王子大光贊來朝貢方物太祖厚有錫賜
後唐同光二年正月遣王子大禹謨來朝五月又遣王

子大元讓來朝莊宗賜金綵以遣之八月又遣姪學堂
親衛大元謙試國子監丞三年二月又遣使裴球貢方
物進細女口五月以入朝使政堂省守和部少卿賜紫
金魚袋裴球爲右贊善大夫天成元年四月遣使大陳
林等一百十六人來朝貢進男口女口各三人并人參
隕布白附子等其年七月遣使大照佐等六人朝貢先
是契丹大首領邪律案巴堅兵力雄盛東北諸番多臣
屬之以渤海國王土地相接常有併吞之志是歲率諸
番部落攻渤海扶餘城下之改扶餘爲東丹府命其子
突欲畱兵鎮之未幾案巴堅殂渤海命其弟率兵攻扶
餘城不能克保覆而退四年五月又遣高正詞入朝貢
方物七月以正詞爲太子洗馬長興二年十二月遣使
成文角來朝三年正月又遣使來朝貢四年七月以先
入朝使成文角爲朝散大夫右神武軍長史奏事右錄
事試大理評事高保父爲朝散郎右驍衛長史並賜金
紫清泰二年十二月遣使列周道等入朝貢方物三年
二月以入朝使南海府都督列周道爲檢校工部尚書
政堂省工部卿烏濟顯試光祿卿周顯德元年七月渤
海國崔烏斯多
等二十人歸化

新羅弁韓之遺種也其國地君世物俗見于唐其大族

曰金氏朴氏自唐高祖時封金真爲樂浪郡王其後世

常爲君長同光元年新羅國王金朴英遣使來朝貢長

興四年權知國事金溥遣使來朴英溥世次卒立史皆

失其紀松漠紀聞契丹阿保機滅其王大謹諱徙其名帳千餘戶于燕給以田疇捐其賦入往來貿易

關市皆不征有自晉以後不復至五代史新羅其國俗戰則用爲前驅

是月拜日月之神婦人以髮繞頭用綵及珠爲飾髮甚鬢美五代會要新羅弁韓之苗裔其國在漢樂浪郡

之地南東俱限大海西接百濟南隣高麗東西千里南北二千里有城邑村落其王所居曰金城周七八里衛

兵三千人文武官凡十七等風俗刑法與高麗等同而朝服尚白人多金朴兩姓俗重九日相慶賀以是日拜

日月之神婦人以髮繞頭用綵及珠爲飾髮甚鬢美其王金真唐武德四年封樂浪郡王龍朔三年又以國爲

雞林州授其王雞林州都督世以金氏爲會長朝貢不
絕後唐同光元年十一月其王金朴英遣倉部侍郎金
樂錄事參軍金幼卿來朝貢二年六月又遣使朝散大
夫倉部侍郎賜紫金岳來朝貢授金岳朝議大夫試衛
尉卿天成二年二月遣使張芬等來朝其年三月以新
羅國權知康州事王逢規爲懷化大將軍新羅國前登
州都督府長史張希巖新羅金州知後官本國金州司
馬李彥謨並檢校右散騎常侍其月又以入朝使中散
大夫兵部侍郎兼賜紫金魚袋張芬爲檢校工部尚書
副使兵部郎中朴述洪御史中丞判官倉部員外郎李
忠式兼御史其年四月新羅國康州遣使林彥來朝貢
詔對於中興殿賜物有差四年二月青州奏於登州岸
獲新羅船一隻進其寶貨長興二年四月權知國事金
簿遣使金肱來貢方物清泰二年二月以入朝使執事
侍郎金肱爲檢校工部尚書副
使司賓大卿李儒試將作少監

黑水靺鞨本號勿吉當後魏時見中國其國東至海南
界高麗西接突厥北隣室韋蓋肅慎氏之地也其畝分

爲數十部而黑水靺鞨最處其北尤勁悍無文字之記
其兵角弓楛矢同光二年黑水兀兒遣使者來其後常
來朝貢自登州泛海出青州明年黑水胡獨鹿亦遣使
來兀兒胡獨鹿若其兩部酋長各以使來而其部族世
次立卒史皆失其紀至長興三年胡獨鹿卒子桃李花
立嘗請命中國後遂不復見云

五代史黑水靺鞨其俗
皆編髮性凶悍無憂戚

貴壯而賤老俗無文
字兵器有角弓楛矢

南詔蠻見于唐其國在漢故永昌郡之東姚州之西僖
宗幸蜀募能使南詔者得宗室子李龜年及徐虎虎姪
謫乃以龜年爲使虎爲副謫爲判官使南詔南詔所居

曰苴畔城龜年等不至苴畔至善闡得其要約與唐爲甥舅僖宗許以安化公主妻之南詔大喜遣人隨龜年等求公主已而黃巢敗收復長安僖宗東還乃止同光二年魏王繼岌及郭崇韜等破蜀得王衍時所俘南詔蠻數十人又得徐謫自言嘗使南詔乃矯詔還其所俘遣謫等持金帛招撫南詔諭以威德南詔不納至明宗時巂州山後兩林百蠻都鬼主右武衛大將軍季卑晚遣大鬼主傅能何華來朝貢明宗拜卑晚寧遠將軍又以大渡河南山前邛州六姓都鬼主懷安郡王勿定標莎爲定遠將軍明年遣左金吾衛將軍烏昭遠爲入蠻

國信使昭遠不能達而還

五代會要南詔蠻本烏蠻之別種在漢永昌之東姚州之

西蠻俗謂王曰詔其先渠帥有六故號六詔各有君長

不相統攝廣明中亦時來朝貢後唐同光三年閏十二

月魏王繼岌奏遣使賫書招諭南詔蠻時初平蜀川乃

募會使南詔者有泰川副史徐藹詣雲南苴咩城路且

云唐中和年僖宗在蜀命嗣王龜年使雲南藹季父爲

副使藹爲判官時不到苴咩城祇達善闡迴約爲甥舅

詐降安化公主雲南使來迎公主使舊收復長安黃

巢東走乃託以他歲而止天成元年十月供奉官李彥

楷高品李光裕雲南使迴山後兩林百蠻都鬼主右武

衛大將軍李罕晚差大鬼主傅能阿花等來朝貢明宗

御文明殿引對百官稱賀時李罕晚爲寧遠將軍大渡

河南山前印州六姓都鬼主懷安郡王勿定標沙爲定

遠將軍二年七月以左金吾衛將軍烏昭遠爲左衛上

將軍入蠻國信使其年九月四川奏據黎州狀申雲南

使趙和於大渡河南起舍一間畱信物十五籠并雜請

一卷遞至闕下初郭崇韜平蜀之後得王衍昔獲俘數

千以天子命令使人入其部被止于界上惟國信與蠻

俘得往續有轉牒稱都督爽大和長國宰相布燮等上

大人唐皇帝男奏疏一封自鶴拓歷至幾美白崖爽等
又入弄棟演習白鸚鵡和膳裔爽等又入平夷新安寧
遠標沙差人轉送黎州其紙厚硬如皮筆力尤健有詔
本後有都爽弛着忍爽王保王寶都彌勒君爽董德義
都爽長垣忍爽緯楊布燮所署有彩牋一軸轉韻詩一
章章三韻其一聯有類擊筑詞頗有思本朝姻親之意
理亦不遜其籠中卽返其國信舊封猶存復命左衛上
將軍烏昭遠往皆不能去冊府元龜後唐魏王繼岌
以莊宗同光三年冬平蜀遣使齎詔南詔蠻時郭崇
韜欲聲教達於南荒募蜀州曾使南詔者有秦州副使
徐藹請雲南苴咩城途路且云中和二年僖宗在蜀令
嗣王龜年使雲南藹季父虔爲副使藹爲判官時不到
苴咩城只達於善闡回時約爲甥舅許出降安化公主
雲南使來迎公主次驛報收長安黃巢東走乃託以佗
歲又唐南蠻侵軼西川苦無亭障自咸通已後劍南
苦之牛叢尙書作鎮爲蠻寇憑陵無以抗拒高駢自東
平移鎮成都蠻猶傳蜀城駢先選曉銳救急人人背神
符一道蠻規知之望風而遁爾後僖宗幸蜀深疑作梗
乃許降公主蠻王以連姻大國喜逾常因命宰相趙
隆眉楊奇鯤段義宗來迎行在且迎公主高太尉自淮

海飛章云南蠻心脅唯此數人請止而鳩之迄僖宗還京南方無虞用高公之策也揚奇鯢輩皆有詞藻途中詩云風裏浪花吹又白雨中嵐影洗還青江鷗聚處窗前見林狹啼時枕上聽詞甚清美

牂牁蠻在辰州西千五百里以耕植爲生而無城郭聚

落有所攻擊則相屯聚刻木爲契其首領姓謝氏其名

見于唐至天成二年嘗一至其使者曰清州八郡刺史

宋朝化冠帶如中國貢草豆蔻二萬箇朱砂五百兩蠟

二百斤

五代史牂牁蠻其國法劫盜者三倍還贓殺人者出牛馬三十頭乃得贖死五代會要牂牁

蠻其地北去

州一百五十里東至辰州二千四百里

南至交州一千五百里西至昆明九百里無城郭散居

村落多霖雨稻皆再熟無徭役唯征戰之時乃相屯聚

刻木爲契其法劫盜者三倍還贓殺人者出牛馬三十

頭乃得贖死首領姓謝氏唐室頻遣使朝貢後唐天成

二年八月牂牁青州八郡刺史宋朝化等一百五十人

來朝貢進草苴蕞二萬顆硃砂五百兩黃蠟二百斤各賜官誥金帛遺之文獻通考唐置費珍莊爰播郎祥夷等州其地北距州百五十里東距辰州二千四百里南距交州一千五百里西距昆明九百里無城郭散居村落上多霖雨稻粟皆再熟無徭役將征戰乃屯聚刻木爲契其法劫盜者償其主三倍殺人者出牛馬三十頭與其家以贖死疾病無醫藥但擊銅鈔羅以祀神風俗與東謝蠻同唐末王建據西川由是不通中國後唐天成二年祥牂清河刺史宋朝化等一百五十人來朝孟知祥據蜀復不通朝貢

昆明在黔州西南三千里外地產羊馬其人椎髻跣足

披氍其首領披虎皮天成二年嘗一至其首領號昆明

大鬼主羅殿王普露靜王九部落各遣使者來使者號

若土附牂牁以來

五代史昆明部落其俗椎髻跣足酋長披虎皮下者披氍五代酋要昆

明部落在黔州西南三千里山路險阻住止高欄亦有羊馬其俗椎髻跣足酋長披虎皮下者披氍後唐天成

二年八月昆明大鬼主羅殿王普露靜王九部落各差使等隨牂牁來朝貢

占城在西南海上其地方千里東至海西至雲南南隣真臘北抵驩州其人俗與大食同其乘象馬其食稻米水兕山羊鳥獸之奇犀孔雀自前世未嘗通中國顯德五年其國王因德漫遣使者莆訶散來貢猛火油八十四瓶薔薇水十五瓶其表以貝多葉書之以香木爲函猛火油以灑物得水則出火薔薇水云得自西域以灑衣雖敝而香不滅五代四夷見中國者遠不過于闐占城史之所紀其西北頗詳而東南尤略蓋其遠而罕至且不爲中國利害云

五代史占城本地鳥之大者有孔雀
五代會要占城國在中國西

南其地東西一百里南北三千里東暨海西暨雲南
暨真臘國北暨驩州界東北至兩浙海行一月程其衣
服制度大畧與大食國同所乘皆象馬粒食稻米肉食
水兕山羊之類獸之奇者有犀牛鳥之珍者有孔雀前
世多不與中國通周顯德五年九月其國王因德漫遣
其臣蒲訶散等來貢方物中有灑衣薔薇水一十五瓶
言出白西域凡水之霑衣香而不蹏又貢猛火油八十
四琉璃瓶引對于內殿賜以冠帶衣服等其表文以貝
多葉檢以香木函其年十一月入朝使蒲訶散金姿叵
羅辭各賜繪帛有差仍命齎金銀器一千兩繪絲一千
疋細甲名馬銀鞍勒等就賜其國王游宦紀聞占城
國前此未嘗與中國通周顯德五年國王因德漫云云
已上見五代史四夷附錄內典云人火得水則滅龍火
得水而熾信有此理陰陽自有變化論曰龍能變水人
能變火龍不見石人不見風魚
不見水鬼不見地此亦理也

五代史記卷第七十四

右五代史記注七十四卷吾 師萍鄉宮保承南昌
彭文勤公未竟之業排比纂輯閱二十年而始成者
也撰集緣起泉采掇諸書詳于吾 師自述敘例毋
俟贅言文勤當日雖悉本裴松之注三國志遺意以
注是書然竊謂松之于元嘉中受詔爲注去陳壽作
史時未遠六朝以前舊籍頗存故得網羅繁富恣其
刺取雜引前聞旁及瑣事洵足爲壽之功臣至其疏
通證明大半參以己意且徵引旣廣間或鄰于嗜奇
不免後人抨擊固由論古者好爲苛繩抑亦見著書
之難也吾 師遭逢

右文盛世

天府著錄凡昔之散佚遺編皆晦而復顯斯注所撫自舊史及會要外尙有二百數十餘種之多以眎松之之引書一百四十三種奚啻倍之兼又以書注書弗參己說條分件繫旁推交通博而不濫精而不濫旣無支蔓猥雜之弊復不似酈道元李善之割裂字句義例謹嚴前所未有與裴注絜長較短異同難易蓋有間矣

文孫

曩預編校之役茲幸剞劂告竣用敢引

伸微悃以諗世之讀是書者道光戊子冬十一月受

業海昌楊文孫謹識